

Carta nú uquie'e San Pablo lubee bene eyeche Colosas enu nzeli arqui' Jesucristo

Uxe'la Pablo saludo

1 Li'á Pablo, necaa tucu apóstol' Jesucristo xne scua niarqui' Diose. Li'á cuna Timoteo enu neca sa'ahua enu nzeli arqui' Jesucristo, ²rquie'eru carta quie' luhua, li'ihua enu neli nzeli arqui' Jesucristo, li'ihua enu neca bee bene' Diose enu nucua'a eyeche Colosas. Diose Pa'ahua cuna Jesucristo enu rnibiya' lua'ahua, ri'inu nú cha nze'ca lu cuenda'hua cuna nú nzuxe arqui'hua.

Rnacu' Pablo lu Diose lu cuenda' bee bene enu nzeli arqui' Jesucristo

³Cada chenu rnacu'ru lu Diose lu cuenda'hua, li'inu enu neca pa' Jesucristo enu rnibiya' lua'ahua, rniru che'tsa lunu lu cuenda'hua. ⁴Xne ubene'la'ru xa nzeli arqui'hua Jesucristo cuna lunú xa secagua bee bene enu neca bee bene'nu, ⁵equie nú nzuculuhua nú riña bichia nú yucuhua eluxene nú nu'che'e liñibe. Li'ihua ungabiya'la'hua nucua' chenu ubene'hua bedicha' nze'ca' Jesucristo nú neli neca.

⁶Nu bedichia' nú neli neca cua' nú ubene'la'hua diqui lu iliulabe nze ri'chia letse bee bedichia' cua' nu diqui bee luhua le'ca nzelila arqui' bee bene bedichia' cua'. Li'ibeella nzelila arqui'beella bedichia' cua' tucu nú ungae luhua chenu ubene'hua lunú xa uhua'a arqui' Diose li'ihua cuna nú neli secanu li'ihua. ⁷Li'ihua uri'ihua beya' nú neli neca nucua' chenu uzete' Epafra's nucua' li'ihua. Li'illa rri'illa elietsa luru nu chiqui' se'caru li'illa xne li'illa neli sibi'lla lu Jesucristo. ⁸Nu le'ca li'illa necalla enu udixiule'e luru lunú xa secagua bee sa'ahua equie nú nzu Espíritu Santo cuna li'ihua.

⁹Enze'e hasta bichia chenu ubene'ru nú xa nehuañihua, la tsana' arqui'ru nú rnacu'ru lu Diose equie cuenda'hua para nú equie cuenda' Espíritu Santo ri'i nze'cahua beya' nú xa niarqui'nu, nu liqui'nu lu ye nú acagua nu xa'lanu elliebacu'hua nú ri'ihua beya' nú ti necanu. ¹⁰Nu scua huañihua tucu nú riala nú huañi bee bene enu neca bee bene'

Jesucristo, nu ri'ihua tucu nú riu' arqui'nu, nu che ri'iláhua puro nú neca nze'ca para nú ri'iláhua beya' Stichia' Diose. ¹¹Nu li'iru le'ca rncu'ru lunu para nú equie nú chiqui' rnibiya'nu ri'inu elietsa luhua nú tsuta' arqui'hua lunu, nu riqui'hua lubee xitse nú nehuana zecahua nu ulu'cuhua paciencia. ¹²Nu hasta ñia tsu arqui'hua dete'hua che'tsa lu Pa'ahua Diose equie nú uquieelanu arqui'hua para nú ati'hua lunú riala bee bene enu neca bee bene'nu enu nzequie inziu'nu. ¹³Diose utsila'a lia'ahua lunú rnibiya' beze'lu para nú udu'nu lia'ahua lunú rnibiya' Lli'ñinu Jesucristo enu secanu. ¹⁴Li'inu udixiunu equie cuenda' stula'ahua nú rlu'cu'la'ahua perdona lu Diose.

**Equie nú ungti Jesucristo
nehuañi nze'cahua cuna Diose**

¹⁵Lecati aca lañi' Diose. Pero Jesucristo neca tucu nú neca Diose, nu nzula Jesucristo cuna Diose hasta chenu lasca' acache' iliulabe. ¹⁶Equie cuenda' Jesucristo ungache' ye nú nu' liñibe cuna nú nu' lu iliulabe, sianu rlañi' bee bene urre nu la lañi' bee bene, nu le'ca equie cuenda' li'inu nu' yee bee elurnibiya' cuna yee bee elu usticia nú rlu'cu bee enu leca modo nú lañi' bee bene. Yeene ungache' lu cuenda' li'inu nu para li'inue. ¹⁷Nzula Jesucristo ante nú acache' iliulabe nu li'inu nuya' cuendanu yeene nu rnibiya'nu lu yeene. ¹⁸Nu le'ca li'inu rnibiya'nu lu ye bee bene enu nzeli arqui' li'inu, enu neca bee bene'nu. Li'inu necanu enu rluti nzula, nu li'inu necanu

enu rluti uhuañi zeca leta bee benenguti para nú ri'i bee bene beya' nú tucutsia li'inu rlu'cunu nú rnibiya'nu lu yeene. ¹⁹Xne uyu' arqui' Diose nú neca Jesucristo tucu nú neca Diose. ²⁰Nu equie cuenda' Jesucristo uyu'u nú uyaala arqui' Diose lubee nú nu' lu iliulabe urre sia beenú nu' liñibe, uyu'u nú uyaala arqui'nu scua lubee nucua' equie cuenda' rene' Jesucristo nú uri'chia chenu ungtinu lu cruse.

²¹Hua'tu istu nzu arqui'hua lu Diose cuna nú necahua xi neca enu rlee lunu, xne uri'itsiahua puro nú necha neca. ²²Pero nee uri'i Diose nú uyu'u nú uyaala arqui'nu luhua equie nú nehuana ulle'ca Jesucristo chenu ungtinu lu cruse para nú riñahua lunu nu lecaxi natsa arqui'hua, cuna nú lecaxi equiya lu'cuhua nú nacu' quiyanu luhua. ²³Pero para nucua' rqui'ña nu chiuca tsuta' arqui'hua chequiehua lunú nzu teneli arqui'hua, sin nú tsana' arqui'hua nú nzequiehua bedichia' nze'ca' Jesucristo nú ubene'la'hua. Nu le'ca li'i bedichia' nze'ca quie' nze ri'chia letse diqui lu iliulabe, nu li'á Pablo, necaa tucu enu rixiule'e bedichia' nze'ca cua' lubee bene.

**Ucañi Diose Pablo para nú
zibi'lla lubee bene'nu**

²⁴Nu nee, chiqui' ñia nzu arquia equie nú nehuana se'ca equie cuenda' li'ihua. Xi neca nú ulle'ca Jesucristo para nú ri'á elietsa lubee bene enu nzeli arqui' li'inu enu neca bee bene'nu. ²⁵Xne Diose udu'u li'á para nú zibi'a lubee bene'nu. Nu li'inu uliqui'nu riña'

cua' lua para nú zetea li'ihua Stichia' Diose tucu nú necane. ²⁶Hasta hua'tu lá ri'i bee bene beya' xa neca Stichia' Diose. Pero nee ulube'lanu xa neca stichia'nu lubee bene enu neca bee bene'nu ²⁷para nú ixiule'e beella lubee bene enu la neca bee bene Israel xa neca eluxene'nu. Nu lunú né lube' Diose lubee bene tiambu nú udetela necane nú nzu Jesucristo cuna li'ihua, nu equie cuenda' li'inu nediya' nze'ca'hua nú nze'ta bichia nú riñahua liñibe.

²⁸Nu li'iru rixiule'eru stichia' Jesucristo, nu rniru bezete' lubee bene, cuna nú sete'ru li'ibeella lu ye nú reca elliebacu'ru para nú equie cuenda' Jesucristo riña beella lu Diose tucu nú riala nú riña beella lunu. ²⁹Nu chiqui' rti'quia arquia nú ri'á riña' quie' cuna poder nú uliqui'nu lua.

2 Niarquia nú ri'ihua beya' nú chiqui' rti'quia arquia para nú ri'á elietsa luhua, cuna lubee bene enu nucua'a eyeche Laodicea nu cuna lu ye beelá bee bene enu lasca' chulu li'á. ²Rti'quia arquia para nú dua'a ana arqui'beella nú aca tucu necatsebeella nu zeca beella bee sa' beella nu lu'cubeella nú chiqui' aca elliebacu' beella para nú aca beella chulu beella lunú nélube' Diose lubee bene tiambu nú udete, nú nucua' neca Cristo. ³Nu equie cuenda' li'inu nze'ta ye nú reca elliebacu' bee bene, cuna nú rri'i bee bene beya'. ⁴Li'á rnia bee bedichia' quie' luhua para nú lecati zequienu li'ihua cuna bee bedichia' nú nu'chi neca. ⁵Añinzuca nú la nzua cuna li'ihua, pero siempre

nchiucu' arquia li'ihua, nu ñia nzu arquia xne rri'ihua tucu nú rialane, cuna nú chiuca nzuta' arqui'hua lunú nzeli arqui'hua Jesucristo.

⁶Enze'e tucu nú nzelila arqui'hua Jesucristo enu rnibiya' le'ca scua uzu'cu'hua lunú rninu, ⁷ucua'nahua nú chequiehua li'inu tucu nú neli neca, nu chiuca utsuta' arqui'hua lunú nzeli arqui'hua li'inu tucu nú ungalahua, nu siempre de'te'hua che'tsa lu Diose.

**Elu nehuañi nú necuqui
neca rliqui' Jesucristo**

⁸Ubi'yahua li'ihua. La tsana'hua nú zequienu bee bene li'ihua cuna elliebacu' beei nú lixiu neca, urre bee bedichia' nú la zibi' nú nze'ta lubee costumbretsia, urre elurnibiya' nú nu' lu iliulabe quie', xne la ye'ta nucua' lu cuenda' Jesucristo.

⁹Xne tucu nú neca Diose scua neca Jesucristo, ¹⁰nu leca' xi qui'ña ri'ihua para nú acahua bene' Diose xne neca tucu necatselehua cuna Jesucristo, li'inu enu rnibiya' lu ye bee enu rnibiya' cuna ye bee elu usticia nú la lañia'ahua. ¹¹Nu le'ca equie nú neca tucu necatsehua cuna Jesucristo, nuya'lahua seña'nu, pero la neca seña quie' xi neca seña nú rquiee bee bene Israel, seña'nu neca nú la huañia'hua tucu nú necatsia elliebacu'hua. ¹²Chenu urinzahua, neca nucua' xi neca nú ungutihua cuna Jesucristo nu uhuañi zecahua cuna li'inu, equie nú nzeli arqui'hua nú rlu'cu Diose poder nu uri'inu nú uhuañi zeca Jesucristo lu eluti. ¹³Hua'tu, li'ihua necahua xi neca bene enu ungutí lu Diose equie

cuenda' stulahua nu equie nú la uya'hua seña nú nuya' bee bene Israel. Pero nee equie cuenda' Jesucristo uri'ila Diose perdona lia'ahua lu cuenda' stula'ahua, nu nee rlu'cula'ahua elunehuañi cuna Jesucristo. ¹⁴Diose uchilala stula'ahua lunú nzu dixiu'ahua tucu nú rnibiya' ley'nu. Uchilanu dula cua' chenu ungoti Jesucristo lu cruse. Nu li'inu udixiunu equie cuenda'ahua. ¹⁵Nu scua uri'inu ana lu ye bee elu usticia, cuna lu ye nú rnibiya' nú nze'ta lu benechiqui'. Nu utsa'na netúnu beei lu ye bee bene nu uri'inu ana lubeei equie nú ungotinu lu cruse.

Uri'ihua elliebacu' beenú nu' liñibe

¹⁶Enze'e la ri'ihua caso bee enu se'ta li'ihua equie nú racuhua urre equie nú rue'ehua, urre equie nú la ri'i casohua bee bichia liñi, urre bichia nú rquiee guu urre bee bichia nú sulachi bee bene, ¹⁷xne ye bee nucua' necatsia xi neca xca'la' Jesucristo, nu nee li'inu ube'talanu. ¹⁸La tsana'hua nú zequienu bee enu rlu'cu ula'na lubee ángele li'ihua para nú tsana' archi'hua inziu' Diose, xne li'ibeei rlube'beeí nú lle'na archi'beeí pero lia rri'itsiabeei nucua'. Le'ca rnibeei nú nu' xi rlube'lu lubeei, che ruti'beeí cuna elliebacu' tsia'beeí. ¹⁹Pero li'ibeei la nzu Jesucristo cuna li'ibeei, li'inu enu rnibiya' lua'ahua. Nu equie cuenda' li'inu nze ri'ila'ahua beya' xa chequie'ahua stichia'nu para nú aca tucu necatse'ahua cuna bee sa'ahua, cuna nú aca tucu necatsehua cuna Jesucristo tucu nú niarqui' Diose.

²⁰Nee tunu neli nú rlu'cuhua elunehuañi nú necuqui neca cuna Jesucristo, cuna nú la qui'ña nú ri'ihua caso stichia' bee bene enu nzequiee lunú la ye'ta lu Diose. ¿Xinu sucu'hua stichia' bee bene enu rni: ²¹“La ti'yalu nucua'. Nu la aculu nucua', nu la na'tselu nucua'”? ²²Ye bee elu rnibiya'cua laxu bee nucua', xne bee benetsia ullela archi' bee nucua'. ²³Neli nú bee elurnibiya' cua' neca xi neca nú chiqui' secae equie nú chiqui' rla'na bee bene nú tsa'alubeei nu sucu'beeí nu rri'ibeei nú nehuaana seca le'catsia li'ibeei, pero lecaxi zibi' elurnibiya' cua' para nú cá nucua' lunú necha neca rle'beeí.

3 Enze'e nee lunú rlu'culahua elunehuañi nú necuqui neca cuna Jesucristo, ucuana'hua nú ri'ihua elliebacu' lu cuenda' beenú nu' liñibe elu nzucu Jesucristo cue'tse Diose chube. ²La ri'ihua elliebacu' beenú nu'tsia lu iliulabe, máse uri'ihua elliebacu' beenú nu' liñibe, ³xne neca xi neca nú ungotilahua lu cuenda' nú nu' lu iliulabe nu rlu'culahua elu nehuañi nú necuqui neca equie cuenda' Jesucristo, lu Diose. ⁴Nu chenu riña Jesucristo, li'inu enu rliqui' elunehuañi lua'ahua, le'ca nuhua yalahua nú huañihua cuna li'inu elurnibiya'nu.

Xa riala nú huañi bee bene enu nzeli archi' Jesucristo

⁵Nee, utsana'hua ye beenú necha neca nu' lu iliulabe quie'. La ri'ihua bee eluhuexe ni' beenú lecaxi zibi', ni' bee elliebacu' nú necha neca, ni' beenú necha neca nú

riu'u ana arqui'hua rri'ihua, le'ca la cua'nahua nú ri'ihua elu neyi' nú lu'cuhua huaxi beenú lu'cuhua xne nucua' neca xi neca nú rlu'cuhua ula'na lunú la neca Diose. ⁶Nu equie cuenda' bee nucua' nze'ta castiya' Diose nú zeca bee bene enu la zucu' nú rninu, ⁷nu sa' beenú necha neca cua' uri'ihua ante nú chuluhua Jesucristo. ⁸Pero nee utsana'hua ye beenú necha neca. La aca nelachi nzu arqui'hua, la leehua lubee sa'hua, nu la ri'ihua beenú necha neca lubee sa'hua, la ze'tahua bee sa'hua, nu la nihua bee bedichia' chi'qui'. ⁹La nihua eluquichia' lubee sa'hua, xne la nehuañia'hua tucu nú uhuañihua hua'tu chenu uri'ihua beenú necha neca. ¹⁰Xne uche'ela Diose xa nehuañihua, necalahua xi neca tucu bene cuqui equie nú lle'naa lle'naa nze acahua tucu nú niarqui' Diose nú acahua para nú chulu nze'cahua Diose, li'inu enu ureche' lia'ahua. ¹¹Nu chenu uyalila arqui' bee bene Jesucristo lecaxi ri'i lunú ti neca beella, tunu neca beella bee bene Israel urre la neca beella bee bene Israel nu tunu nequiee seña nú rquiee bee bene Israel li'ibeella, urre la nequiee seña cua' li'ibeella, tunu necabeella bee bene rene nu tunu necabeella bene ixí nu tunu necabeella enu neiqui lu stucu bene urre la necabeella enu neiqui. Pero lunú máse seca nú chili arqui' bee bene Jesucristo, li'inu enu rnibiya' nu nzu cuna ye'ahua.

¹²Diose seca li'ihua, enze'e ucañinu li'ihua para nú acahua bee bene'nu. Enze'e uhua'a arqui'hua bee bene, aca nze'cahua nu la aca

nelachihua. La aca nelliñahua, utsuquie arqui'hua bee sa'ahua. ¹³Uriqui'hua bee sa'hua, nu uri'ihua perdona li'ibeella tunu nu' xi rri'ibeella luhua. Tucu nú uri'i Jesucristo perdona li'ihua le'ca esquie uri'ihua perdona bee bene. ¹⁴Lu cuenda' yeene máse rqui'ña nú seca bee bene sa'lla. Nu eluseca cua' neca nú rri'i elietsa para nú huañi bee bene nú neca tucu necatse beella. ¹⁵Utsana'hua nú nibiya' Jesucristo luhua para nú lu'cuhua nú nzuxe arqui'hua xne para nucua' ucañi Diose li'ihua para nú aca tucu necatsehua lubee sa'hua equie cuenda' Jesucristo, nu ude'tehua che'tsa lunu equie cuenda' nucua'. ¹⁶Chiqui' udu'equiehua bee stichia' Jesucristo. Uze'te'hua bee sa'hua nu uni'hua bezete' lubeella tucu nú rialane. Diquinu' arqui'hua ude'te'hua che'tsa lu Diose, cuna bee canto cuna bee salmos nú cuna bee canto nú neca para li'inu. ¹⁷Ye beenú rri'ihua urre rnihua, rluti ullu'cu arqui'hua Jesucristo enu rnibiya' lua'ahua nu equie cuenda' li'inu dete'ahua che'tsa lu Pa'ahua Diose.

**Xa riala nú huañi bene enu
nzeli arqui' Jesucristo**

¹⁸Li'ihua bee una'a enu nechiala, uzu'cu'hua nú rni bee niyu'hua xne scua riala nú ri'i bee bene enu nzeli arqui' Jesucristo. ¹⁹Nu le'ca esquie li'ihua bee niyu enu nechiala, uzecahua bee una'ahua nu la xitse ri'inuhua li'ibeella. ²⁰Le'ca esquie li'ihua bee endu', lu yeene uzu'cu'hua nú rni bee pa'ahua cuna nú rni bee na'hua, xne scua riu'

arqui' Diose nú ri'ihua. ²¹Nu le'ca esquie li'ihua bee paa cuna bee naa, la detehua lunú rri'inuhua bee endu'hua para nú la laca quieebeci lunú rri'inuhua beei.

²²Li'ihua bee enu rri'i riña' bee bene, uzu'cu'hua ye nú rni bee bene enu rri'ihua riña'lu lu iliulabequie'. La ri'itsiahua nucua' chenu ri'yatsia beella luhua para nú ya'na nze'cahua lubeella, uri'ihua riña'beella diquinu' arqui'hua equie nú rlucluhua ula'na lu Jesucristo. ²³Tatse beenú ri'ihua, uri'ihuane diquinu' arqui'hua. Uri'ihua nucua' xi neca nú sibi'hua lu Jesucristo, nu la zibi'hua lubee bene. ²⁴Xne li'ihua nediya'hua nú scua yucuhua lunú liqui' Jesucristo enu rnibiya', equie nú sibi'hua lunu. ²⁵Pero bee bene enu rri'i nú necha neca, li'ibeei yalabeei castiya lunú necha neca uri'ibeei, xne tucutse rri'i Diose elu usticia'nu lubee bene.

4 Le'ca esquie li'ihua bee patrón, uri'ihua tucu nú rialane lubee bene enu rri'i riña' luhua nu uri'i nze'cahua lubeeci xne li'ihua nediya'hua nú liñibe nzucu li'inu enu rnibiya' luhua.

²Utsutsiñahua na'cu'hua lu Diose sin nú llaca'hua, nu ude'te'hua che'tsa lunu. ³Le'ca una'cuhua lu Diose equie cuenda'ru para nú xa'lanu inziu nú nzetixiule'eru stichia' Jesucristo nú lasca' chulu bee bene hasta hua'tu. Nu equie cuenda' bedichia' cua' nchiñia ni'cu'. ⁴Le'ca una'cuhua lu Diose para nú ixiale'e nze'caa bee bedichia' cua' lubee bene tucu nú riala nú ixiale'ene.

⁵Uhuañihua tucu nú riala nú huañihua lubee bene enu lasca'

chili arqui' Jesucristo, nu uni'hua lubeeci stichia'nu chenu nu' modoe.

⁶Chenu rdichia'hua, uni'hua lubee bene bee bedichia' nú nuya' resuna para nú yu' arqui'beei lunú rnihua para nú chenu nedichia' bee bene luhua acahua cuaquihua lubeeci.

Uxe'la beella saludo

⁷Tíquico, enu neca tucu bee sa'ahua enu chiqui' se'ca'ahua, li'illa enu neli rri'i elietsa lua lunú sibi'ru lu Jesucristo, li'illa ixiale'ella luhua lu ye nú xa nzucu'ca'a. ⁸Xne para enze'e xe'laalla luhua para nú ixiale'ella luhua nú xa nellua'aru ca'a, nu para nú du'lla ana arqui'hua. ⁹Nu cuna li'illa xe'la Onésimo, tucu sa'hua enu se'ca'ahua nu nehuañilla tucu nú rialane nu necalla bene lachihua. Li'ibeella ixiale'ebeella luhua lu ye beenú reca ca'a.

¹⁰Aristarco, enu nchiñinua ni'cu' xe'la saludo luhua. Le'ca esquie Marco bichi e'ne Bernabé xe'la saludo luhua, nu udixiale'elá luhua nú ti neca Marco tunu nze'tabi'yalla li'ihua, uyucuhua li'illa tucu nú rialane. ¹¹Nu le'ca esquie Jesús enu le'ca lee Justo, xe'la saludo luhua. Leta ye bee bene Israel enu nzeli arqui' Jesucristo, li'itsia beella neca beella enu rri'i elietsa lua para nú rixiale'eru xa neca nú rnibiya' Diose, nu li'ibeella neca beella enu rdu' ana arquia. ¹²Le'ca Epafras bene lachihua xe'la saludo luhua. Li'illa sibi'lla lu Jesucristo, yee bichia rna'cu'lla lu Diose equie cuenda'hua para nú tsuta' arqui'hua lunú nzequiehua inziu' Diose nu ri'ihua beya' yeene tucu nú niarqui'

Diose. ¹³Li'á nediya nze'ca nú chiqui' nzenú arqui' Epafras lu cuenda'hua, cuna lu cuenda' bee bene Laodicea, cuna lu cuenda' bee bene Hierápolis. ¹⁴Lucas enu neca doctor enu chiqui' se'ca'ahua cuna Demas, xe'la beella saludo luhua.

¹⁵Uri'ihua saludar bee sa'ahua enu nzeli arqui' Jesucristo enu nucua'a eyeche Laodicea, nu le'ca uri'ihua saludar Ninfas cuna ye bee bene' Jesucristo enu riete' sa' ni'lla. ¹⁶Chenu laxu nú ulahua carta quie',

che xe'lahuane lubee bene eyeche Laodicea enu nzeli arqui' Jesucristo para nú le'ca ula beella lue. Nu le'ca carta nú uxe'la lubeella rqui'ña nú xe'la beellae luhua para nú le'ca ulahuane. ¹⁷Nu uni'hua lu Arquipo nú tsalulla lunú ucañi Jesucristo li'illa nú ri'illa.

¹⁸Li'á Pablo, nu le'ca li'á rquie'a letra quie' para nú xe'la saludo luhua. Ullu'cu' arqui'hua nú nchiña ni'cu'. Diöse ri'i nú cha nze'ca lu cuenda' yehua. Amén.